



Adresa: **Ul. Hamdije Čemerlića 39a**  
71000 Sarajevo  
<http://www.voda.ba>

tel. +387 33 726 412  
fax. +387 33 726 423  
e – mail: [info@voda.ba](mailto:info@voda.ba)

Broj: **UP-1/21-3-40-602-5/22**

Datum: **25.01.2023. godine**

Agencija za vodno područje rijeke Save» Sarajevo rješavajući po zahtjevu korisnika JKP «6. MART» d.o.o. Goražde za izdavanje vodne dozvole za aktivnost zahvatanja vode iz rijeke Drine putem vodozahvata „Vitkovići“, za potrebe snabdijevanja vodom Grada Goražde, na osnovu člana 109. stav (1) tačka 1. Zakona o vodama («Službene novine Federacije BiH», broj 70/06), i člana 200 stav (1) Zakona o upravnom postupku («Službene novine Federacije BiH», broj 2/98, 49/99 i 61/22), d o n o s i

### **RJEŠENJE** **o vodnoj dozvoli**

1. Daje se vodna dozvola korisniku JKP «6. MART» d.o.o. Goražde, za zahvatanje vode iz rijeke Drine u svrhu obezbjeđenja potrebnih količina vode za piće stanovništva i privrede u sklopu javnog vodovodnog sistema Goražde. Voda se zahvata iz rijeke Drine putem vodozahvata u riječnom koritu i preko postrojenja za pripremu pitke vode („fabrika vode – vodozahvat Vitkovići“), kapaciteta  $Q=240$  l/s, distribuirana prema potrošačima.
2. Vodna dozvola se daje na osnovu dostavljene dokumentacije, utvrđenog činjeničnog stanja i uz slijedeće uslove:
  - 2.1. Da korisnik predmetnog vodozahvatnog objekta isti održava u funkcionalnom stanju i koristi u skladu sa njegovom namjenom, te prema uslovima iz ove vodne dozvole.
  - 2.2. Da obezbijedi tehničku ispravnost ugrađene opreme na postrojenju za kondicioniranje kao i na objektima transportnog sistema (pumpe, vodomjeri, zatvarači itd.).
  - 2.3. Da korisnik predmetnih objekata ugrađene mjerne uređaje za evidentiranje zahvaćenih količina vode održava u ispravnom stanju, odnosno da redovno vrši baždarenje mjerača protoka u skladu sa propisima o mjernim uređajima.
  - 2.4. Da se zahvaćena voda tretira na postrojenju za pripremu pitke vode primjenom tehnologije koja će dati vodu za piće kvaliteta propisanog Pravilnikom o zdravstvenoj ispravnosti vode za piće ("Službeni glasnik BiH", br. 40/10, 43/10, 30/12 i 62/17).
  - 2.5. Da kontrolu-ispitivanja kvaliteta vode za potrebe vodosnabdijevanja vodom za piće stanovništva mogu vršiti ovlaštene laboratorije, u skladu sa članom 48 stav 3. Zakona o vodama.
  - 2.6. Da se vrši stalna dezinfekcija vode hlorisanjem kao i kontrola rezidualnog hlora u pitkoj vodi u distributivnoj mreži, a u skladu sa Pravilnikom o zdravstvenoj ispravnosti vode za piće.
  - 2.7. Da se, ukoliko se prilikom redovnih ili vanrednih analiza i kontrola kvaliteta vode iz ovog vodovodnog sistema utvrdi da ista ne zadovoljava uvjete vode za piće propisane Pravilnikom o zdravstvenoj ispravnosti vode za piće, vodovodni sistem treba isključiti iz upotrebe odnosno blagovremeno, na adekvatan način, obavijestiti krajnje potrošače da voda nije za piće.
  - 2.8. Da korisnik izvorišta u cilju kontrole, evidencije i plaćanja količina zahvaćene vode vrši mjerenje iste što se u ovom trenutku obezbijeduje putem instaliranog mjerača protoka. Vodomjer je instaliran na dovodnom cjevovodu na ulazu postrojenja za tretman vode za piće. Evidenciju o mjerenjima zahvaćenih količina vode vršiti u skladu sa Pravilnikom o sadržaju i načinu vođenja evidencije i dostavljanje podataka o količinama zahvaćene vode („Službene novine FBiH" br. 83/08).
  - 2.9. Da se vrši redovna kontrola uskladištenih hemikalija i obezbijede svi potrebni uslovi u cilju sprječavanja zagađenja površinskih i podzemnih voda uskladištenim materijama.
  - 2.10. Da se u periodu važenja ove dozvole donese Opći akt o održavanju, korištenju i promatranju vodnog objekta u skladu sa Pravilnikom o minimumu sadržaja općeg akta o održavanju, korištenju i promatranju vodnih objekata («Službene novine Federacije BiH» broj 97/19).

- 2.11. Da se u vremenu važenja ove vodne dozvole kod nadležnih organa pokrene aktivnost u cilju usklađivanja važeće Odluke o zaštiti izvorišta za piće grada Goražda - rijeka Drina - vodozahvat „Vitkovići“ u skladu sa važećim Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta voda za javno vodosnabdijevanje ("Službene novine Federacije BiH", br. 88/12). Korisnik je do donošenja usklađene Odluke zonama sanitarne zaštite dužan sprovesti mjere zaštite propisane važećom Odlukom.
- 2.12. Da se na ekološki prihvatljiv način riješi trajno zbrinjavanje mulja koji nastaje na postrojenju za pripremu vode za piće, pri čemu se zabranjuje njegovo odlaganje na vodno dobro, javno vodno dobro, obale i korito vodotoka.
3. Korisnik objekata treba da u cilju kontrole, evidencije i plaćanja količina zahvaćene vode nastavi da vrši kontinuirano mjerenje količina zahvaćene vode i podatke o tim mjeranjima unosi u Knjigu evidencije o količinama zahvaćene vode. Korisnik objekata je obavezan vršiti plaćanje posebne vodne naknade u skladu sa članom 170 stav 1. tačka 1. alineja 1. Zakona o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 3/16).
4. U slučaju vanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta je obavezan izvijestiti nadležne organe i postupati po nalogu mjerodavnih institucija, te preduzimati hitne mjere i aktivnosti na sprečavanju širenja onečišćenja i na otklanjanju uzroka onečišćenja.
5. Prava stečena na osnovu ove vodne dozvole ne mogu se prenositi na treća lica, a ista se mogu izmjeniti u zakonom propisanim slučajevima.
6. Ova vodna dozvola, shodno članu 117. stav (1) Zakona o vodama se daje sa rokom važenja od pet (5) godina, od dana pravosnažnosti ovog rješenja.
7. Prije isteka važnosti ove dozvole korisnik je dužan da podnese zahtjev za izdavanje nove vodne dozvole.
8. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

### Obrazloženje

JKP «6. MART» d.o.o. Goražde, podnijelo je ovoj Agenciji zahtjev za izdavanje vodne dozvole za zahvatanje vode iz rijeke Drine, vodozahvat „Vitkovići“, u svrhu snabdijevanja vodom za piće stanovništva i privrede u sklopu javnog vodovodnog sistema Goražde.

Uz zahtjev je dostavljena slijedeća dokumentacija:

- Ovjereni kopiji Rješenja o izmjenama podataka, broj: 045-0-Reg-22-000 026 od 09.05.2022. godine, izdato od Općinskog suda u Goraždu;
- Ovjereni kopiji Uvjerenje o poreznoj registraciji od 20.09.2006. izdato od Porezne uprave - Kantonalni ured Goražde;
- Kopija rješenja o odobrenju za građenje broj: UP-1:09-23-72/02 od 13.11.2002. godine, izdato od Ministarstva za urbanizam, prostorno uređenje i zaštita okoline BPK;
- Spisak projektne dokumentacije predmetnog objekta;
- Rješenje o vodnoj dozvoli broj UP-I/25-3-40-224-9/17 od 19.09.2017. godine izdato od strane Agencije za vodno područje rijeke Save Sarajevo;
- Izvještaj o rezultatima ispitivanja kvantitativnih karakteristika efluenta sa programom praćenja stanja voda (monitoring) od 30.10.2019. godine, urađen od strane ZGI d.o.o. Mostar;
- Dokaz o uplaćenju upravnoj taksi.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U cilju utvrđivanja činjenica vezanih za ispunjenje uslova u smislu izvršavanja obaveza propisanih tačkom 4. iz Rješenja o vodnoj dozvoli broj: UP-I/25-3-40-224-9/17 od 19.09.2017. godine, zatraženo je očitovanje Službe za naplatu prihoda (vodnih naknada) ove Agencije po pitanju izmirivanja obaveza uplate posebnih vodnih naknada, tj. eventualnom dugu i visini duga podnosioca zahtjeva.

Na osnovu očitovanja Službe za naplatu prihoda (vodnih naknada) od 11.01.2023. konstatovano je da je podnositelj zahtjeva JKP «6. MART» d.o.o. Goražde uredan obveznik plaćanja posebnih vodnih naknada.

U skladu sa članom 12. Stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», br. 31/15, 55/19, 41/20 i 63/22), izvršen je obilazak predmetne lokacije i tom prilikom sačinjen zapisnik o uviđaju broj: UP-1/21-3-40-602-3/22 od 19.01.20212. godine.

Na osnovu pregleda dostavljene dokumentacije i izvršenog uviđaja na predmetnoj lokaciji utvrđeno je slijedeće:

Vodovodni sistem grada Goražde zasniva se na korištenju vode rijeke Drine koja je uključena u sistem preko vodozahvata „Vitkovići“ i postrojenja za pripremu pitke vode („Fabrika vode – vodozahvat Vitkovići“), kapaciteta  $Q=240$  l/s.

Proces obrade vode na predmetnom postrojenju obuhvata slijedeće procese:

- Mehaničko odstranjivanje čvrstih materija iz vode,
- Koagulacija / taloženje,
- Filtracija na pješčanim filterima i
- Dezinfekcija vode.

U sklopu objekta „vodozahvat Vitkovići“ nalaze se slijedeći objekti:

- vodozahvat u koritu rijeke,
- pjeskolov,
- pumpna stanica (objekat) sirove vode,
- dinamički taložnik,
- pješčani filter (4 filtera),
- rezervoar pitke vode,
- pumpne stanice,
- prostorija za hemikalije,
- laboratorija i
- komandne prostorije.

Koncept je zasnovan na vodozahvatu izgrađenom u koritu rijeke Drine putem koga se može zahvatiti do 240 l/s. Zahvaćena voda se nakon prolaska kroz pjeskolov gravitaciono transportuje do pumpne stanice sirove vode odakle se potisnim cjevovodom transportuje do sistema za predfiltraciju i dinamičkog taložnika gdje se odvija proces koagulacije i taloženja, nakon kojeg se odvodi na otvorene pješčane filtere (četiri filterska polja). Poslije filtriranja, voda otiče u rezervoar čiste vode gdje se vrši dezinfekcija hlor dioksidom putem automatske dozir pumpe.

Prečišćena voda se potisnim cjevovodom DN400mm transportuje ka rezervoaru Rasadnik ( $2 \times 1000 \text{ m}^3$ ) i Vitkovići ( $2 \times 50 \text{ m}^3$ ). Iz rezervoara Rasadnik voda se gravitaciono transportuje do rezervoara Površnica ( $2 \times 500 \text{ m}^3$ ) i pumpne stanice Površnica kojom se voda podiže do rezervoara Rorovi ( $2 \times 150 \text{ m}^3$ ). Iz rezervoara Rorovi, voda se gravitaciono transportuje za drugu visinsku zonu i rezervoar Grabovik ( $2 \times 50 \text{ m}^3$ ).

U sklopu objekta se nalazi i laboratorija u kojoj se vrši redovna analiza vode. Hemikalije se skladište u prostoriji u prizemlju objekta.

Redovnu kontrolu prečišćene vode vrši laboratorija u sklopu fabrike vode Vitkovići, sedmične analize vode i rezidualnog hlora vrši Zavod za javno zdravstvo BPK, a periodične analize Zavod za javno zdravstvo FBiH.

Upravljanje predmetnim objektima i opremom mora se obavljati uz primjenu potrebnih mjera zaštite, kako ne bi došlo do ugrožavanja izvorišta tokom rada u normalnim i vanrednim situacijama. Sam vodozahvat i njemu pripadajući objekti nalaze u ograđenom krugu, što predstavlja I zaštitnu zonu.

U cilju najstrožije kontrole ovog prostora, ova zona je na odgovarajući način ograđena, kako bi se spriječio pristup neovlašćenih osoba. Pored ograde, ovaj prostor potrebno je obezbijediti i drugim mjerama fizičke zaštite i osiguranja, što prvenstveno uključuje službu fizičkog obezbjeđenja na izvorištu, te alarm i druge mjere zaštite, ukoliko se to ocijeni potrebnim.

Područje I zaštitne zone uvijek mora biti na odgovarajući način obilježeno, kako bi građanstvo moglo znati da pristup ovoj zoni nije dozvoljen. Na tabli kojom se obilježava I zaštitna zona mora biti upisan naziv izvorišta i zaštitne zone, broj dežurnog telefona za hitne slučajeve i upozorenje o zabrani neovlašćenog pristupa, a ukoliko se ograda i table sa upozorenjima iz bilo kojih razloga oštete, iste treba u što je moguće kraćem vremenu dovesti u prvobitno stanje.

Razmatrajući podneseni zahtjev, a na osnovu utvrđenog činjeničnog stanja i uviđaja izvršenog na vodozahvatu «Vitkovići», podnosiocu zahtjeva su ovom vodnom dozvolom, u dispozitivu Rješenja propisani uslovi u skladu sa odredbama Zakona o vodama, Pravilnika o sadržaju, obliku, uvjetima načinu izdavanja i čuvanja vodnih akata, te odredbama Pravilnika o zdravstvenoj ispravnosti vode za piće. Podnosilac zahtjeva, kao korisnik, odnosno vlasnik objekata obavezan je pridržavati se navedenih uslova, u skladu sa članovima 48., 64., 66., i 116. Zakona o vodama («Službene novine Federacije BiH», broj 70/06) i članovima 12. i 13. Pravilnika o sadržaju, obliku i uvjetima i načinu izdavanja i čuvanja vodnih akata.

Na osnovu provedenog postupka konstatuje se da je podnosilac zahtjeva, JKP «6. MART» d.o.o. Goražde, ispunio minimum uslova za izdavanje vodne dozvole za izdavanje vodne dozvole za zahvat vode sa vodozahvata „Vitkovići“ u svrhu obezbjeđenja potrebnih količina vode za piće stanovništva i privrede grada Goražde koji se vodom snabdijeva putem javnog vodovodnog sistema, te je riješeno kao u dispozitivu ovog rješenja.


Podnosilac zahtjeva je, na ime izdavanja ovog vodnog akta, izvršio uplatu federalne takse iz tar. br. 43. Zakona o federalnim upravnim taksama i Tarife federalnih upravnih taksi («Službene novine Federacije BiH», br. 6/98, 8/00, 45/10 i 43/13).

#### **UPUTA O PRAVNOM LIJEKU:**

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.

Voditelj postupka  
Nihad Pezo, dipl.inž.građ.

Po ovlaštenju  
Rukovodilac sektora za izdavanje  
vodnih akata

  
Haris Ališehović, dipl.inž.građ.

#### **Dostaviti:**

- JKP „6. mart“ d.o.o. Goražde, ul. Selvera Sijerčića br. 21, 73000 Goražde
- AVP Sava, ISV – Vodna knjiga;
- Sektor 50,
- ⊖ Sektor 40, arhiva
- oglasna ploča AVP – Sava